

**Date – 15/02/2026**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Urban Development & Poverty Alleviation Department minister Pu K. Sapdanga chuan nimin khan a department hnuai hna thawh lai mek hmun 10 a tlawh.**
- 2. LESDE Minister Pu Lalnghinglova Hmar chuan LESDE Kut chu kuthnathawkte, thiamthil neite leh hna zawng mekte puala buatsaih a nih thu a sawi.**
- 3. Hmangaihte Ni 'Valentines Day' pualin nimin khan Aizawlah a mamawh apiang te hman tura a thlawna thisen pe zat chu mi 200 an chuang.**
- 4. Prime Minister Narendra Modi chuan nimin khan Assam-ah cheng nuai 5,450 chuang senna project eng emaw zat a hawn bakah a vailiam bawk.**

<><><>

**UD&PD MINISTER**

Urban Development & Poverty Alleviation Department minister Pu K. Sapdanga chuan nimin khan a department hnuai hna thawh lai mek hmun 10 a tlawh.

Minister hmun tlawhte hi - Hualngohmuna Construction & Demolition Waste Processing Centre; Hlimen Playground; Mission Veng New Age Multifaceted Urban Centre; Pu Thangfala Colony, Chawnpui bula Storm Drain; Pi K. Sangthuami In, Chawnpui bula Storm Drain; Zotlang Green Cemetery; NH 108, Hunthar bula Storm Drain; Hunthar By-Pass Road; Vaivakawn Thlanmual thar panna Approach Road leh Maumuala internal road leh New Market bula City Centre te a ni.

Minister hi UD&PA official - Pu Lalmalsawma Pachuau, Secretary; Pi Zarzokimi, Joint Secretary; Pu Jacob Lalawmpuia, Director; Pu Vabeimozachhi Chozah, Under Secretary; Aizawl Smart City Ltd (ASCL) atangin Pu CC Lalchhuangkima, CEO leh Pu V. Lalruatlana, Deputy CEO bakah PWD atangin Pu Hrangthanga Zote, Chief Engineer, PWD (Buildings & Other Departments) te'n an tawiawm a. Minister hian a satu contractor-te kawmin hnathawh kal mek leh hmabak la awmte a zawtfiah a ni.

<><><>

**LESDE KUT**

Labour Employment Skill Development & Entrepreneurship (LESDE) Minister Pu Lalnghinglova Hmar chuan LESDE Kut chu kuthnathawkte, thiamthil neite leh hna zawng mekte puala buatsaih a nih thu a sawi.

Nimin khan Lammualah LESDE Kut 2026 chu khar a ni a, he hunah hian Minister chuan LESDE Department inhmelhriattirna leh sawrkar hnuaiia hamthatna hrang hrang an dawn theihte pholanna hun a nih thu a sawi a. LESDE Department chu department lian ni lo mah se Central Ministry 5 – Labour Ministry, Skill Development & Entrepreneurship Ministry, Ministry of External Affairs leh Ministry of Corporate Affairs nen indawrin an thawhho thu a tarlang a. Mizoram pawh entrepreneurship leh thiamthil zir kawngah hma kan sawn viau rualin, thil tha zawk leh danglam zawk ngaihtuah chhuaka siam chhuah tum zel turin kalkhawmte a fuih a ni.

LESDE Kut-ah hian stall 162 hawn niin, heng zingah hian Mizoram pawn atangin stall 11 hawn a ni a. February ni 13 thlenga chhinchhiah danah chuan Kutah hian kuthnathawkte leh hna zawng mek mi 234 sawrkar scheme hrang hrang hnuaiia an inziaklut a, mi 28-in hna an hmu a, Health Check-up mi 1000 chuangin a thlawnin an ti a. Stall hrang hrangte inhralh zat chu nuai 35 vel bawr a ni.



### **VDAY BLOOD DONATION**

Hmangaihte Ni 'Valentines Day' pualin nimin khan Aizawlah a mamawh apiang te hman tura a thlawna thisen pe zat chu mi 200 an chuang.

Association for Voluntary Blood Donation (AVBD), MSACS, NHM, KFC leh Civil Hospital, Aizawl-a Model Blood Bank te tangho chuan Dawrpui Multipurpose Hall-ah Valentine's Day Blood Donation Camp an buatsaih a, South Tuipui Bialtu MLA Pu Jeje Lalpekhlua chuan he hun hi a hmanpui a ni.

Pu Jeje Lalpekhlua chuan Midangte tana thisen pe a midangte tana luangchhuak thei nih chu thil lawmawm tak a nih thu a sawi a. Mizoram pawn hmun hrang hrangah awmin mi chi hrang hrang a chenpui thin thu leh chuta Mizo nih nawmna chu tlawmngaihna a nih thu a sawi a. Vawiina tlawmngaia thisen pe tura kalkhawm an tam zia a hmuhin Mizo nih chu nuam a tih zia leh vannei a intih zia a sawi a. Mi tam takin vawi tam tak thisen an pek theih chhan chu an hrisel vang leh an taksa an uluk vang a nih thu a sawi a. Thalaite chu hriselna vawng tha a, nun uluk turin a chah a ni.

He hunah hian Civil Hospital, Aizawl Blood Bank-a Sr. Medical Superintendent Dr. Lalchhuankimi pawhin thu sawiin thisen pek tangkaizia leh nghakhlel tu an tam zia hriat a pawimawh a ti a. Thisen unit khat pawh a hlu tih sawiin unit khat, bag khat hi component 4 ah chhuah a nih thu leh tangkai takin damlote mamawh dan hrang hrang milin siam thin a ni a ti a. Bag li bag nga ah siamin a mamawhtu ten an mamawh na chat chatah pek a ni a, a tangkai hle tih a sawi a ni. Thisen pek sa a awm chu rikrum thilah a tangkai hle tih a sawi bawk a ni.



### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



**DDK DIRECTOR (News)**

Doordarshan Director (News) Pu Nampibou Marinmai chuan Khawzawl Dist hmun pawimawh a fanna kal zelah Chawngtlai a Historical hmun hma Khawpui tan leh Zo Hill Station te a tlawh.

Nimin a hun hmanah Pu Nampibou chuan, Khualzin mite hipna hmu tha leh nuam felfai taka an enkawl chu lawmawm a tih thu te sawiin, Chawngtlai khua chu khaw taima tak nia a hriat bakah an eizawna pui ber Sapthei chin an uar te, Tomato leh Sawhthing an ching nasa chu fakawm a tih thu a sawi a. Ramngaw te chu a nih ang ang humhalh a ni tih a hmuh in entawn tlak a ti hle. Director chuan History hmunhlui a theih ang ang a tlawh zingah Lasi Lalnu Taninchhingi pukah te lutin khaw chhung hmun hma hrang hrang afang thei chu a nun tihlim tu a nih thu a sawi bakah hun remchang hmasa a tlawh nawn leh a, Khawtlang hruaitute nen a inkawmna hunt ha neih a duh thu a sawi ani.

He hun hmanna hi Chawngtlai Historical hruaitu te leh Khawzawla DD NEWS Stringer ten an tawiam a ni.



**CYMA PRESIDENT**

Central YMA President Pu R. Lalngheta chuan, Ruihhlo do kawngah kohhran leh pawl hrang hrangte nen tanho thiam a ngai a ni a ti.

He thu hi nimin chawhnu a Champhai Sub-Headquarters YMA buatsaih, YMA Kumpuan, ‘Ruihhlo Do’ hawna inkhawm leh kumin-a Sub-hqrs.YMA thuthmun branch hruaitu tharte Pathian hnena hlanna inkhawm, Champhai Zote Community Hall-a an buatsaihah khuallian nia a hmanpui naah sawiin. Pu R. Lalngheta chuan, YMA hruaitute chu ram chhan tura Pathian hmaa ding tur anga inngai tur an nih thu a sawi a. Ruihhlo do kawngah hruaitu nihna chelh si, che chhuak thei si lo an awm em tih zawtin, ruihhlo avanga Mizo thalaite thlanmual thlenga kan inthlahliam reng mai chu thil pawl tak a nih avangin, mahni mawhpurhna hlen tura tan la thar tur leh tumah hlahh bik nei lova hma la turin YMA hruaitu leh member tinte a ngen a. Ruihhlo la tive lote venna turin Sunday School thlengin hmalak a ngai a ni a ti bawk.

Ruihhlo dona kawnga chak zawka hmalakna kalpui a nih theih nan, Sorkar laipui atangin ruihhlo dona atana hman tur motor lei nan cheng nuai 88 zet ruahman fel a nih tawh thu a sawi bawk ni.



**PM in Assam**

Prime Minister Narendra Modi chuan nimin khan Assam-ah cheng nuai 5,450 chuang senna project eng emaw zat a hawn bakah a vailiam bawk.

Guwahati-ah cheng vaibelchhe 3,000 senga sak, Guwahati leh North Guwahati thlunzawmna lui Brahmaputra kamah Kumar Bhaskar Varma Setu chu a hawng a. Bridge hawn a nih hnuah Prime Minister hian a bul hnaia awm Lachit Ghat-ah a kal a, Kamrup district-a Amingaon-a IIM Guwahati-a temporary campus leh National Data Centre for North Eastern Region chu virtual-in a hawng bawk a ni.

**Prime Minister hian PM-eBus Sewa Scheme hnuaia electric bus 225 a vailiam off bawk a. Guwahati tan Bus 100, Nagpur leh Bhavnagar tan bus 50 theuh leh Chandigarh panna bus 25.**

**Assam tlawha zin Prime Minister hian Guwahati-a Booth Vijay Sankalp Sabha-ah thu a sawi a. Assam telin hmarchhak pumpui chu India rama Ashtalakshmi a nih thu a sawi a. Kum 11 kalta chung khan BJP kaihhruai NDA sorkar chuan hmarchhak bial hmasawanna a ngaih pawimawh thu a sawi a. Congress chu an rorel chungah he bial hi ngaihsak lo ah puhin leh an rorel chungin hmasawanna a awmluh thu a sawi a ni.**

**Kum 11 kalta chung khan hmarchhak tan cheng vaibelchhe nuai 5.5 chuang dah a nih thu leh he bial chungah infrastructure sector-ah hmasawanna hmuh theih a awm thu a sawi bawk a ni.**

<><><>